

Prodi Europako Batzordeko buru

Santerren agintaldia bururaino eraman ondoren, bost urterako izendatuko dute

Allande Sokarros / Baiona

Romano Prodi Italiako lehen ministro ohiak ordezkatzuko du Jacques Santer Europako Batzordeko presidente karguan. Hala erabaki zuten atzo Berlinen bilduak diren Europako Batasuneko estatuburu eta gobernu-buruek. Prodi zen aipatuena Santerren ordezkatzeko, eta berari tokatuko zaio iruzur auziek belztutako Europako Batzordearen ibileran aldaketak bultzatzea.

EUROPAKO BATASUNEKO (EB) 15 Estatuetako agintariek ez dute denborarik galdu nahi izan eta Prodi aukeratu zutela jakiterat eman zuten atzo arratsalde hasieratik. «Erakusterat eman dugu azkar ekiteko ahala badugula» adierazi zuen Gerhard Schroederrek; izan ere, Europako Batasuneko agintariek ez zuten Europaz ezintasun eta zalantza irudirik eman nahi, NATO, bere aldetik, Jugoslaviaren aurka egiterat abiatzen den unean.

Batasuneko zenbait Gobernuak nahiago izanzen zuten denbora gehiago edukitzea batzordeko buruzagiaren aukeratzeko baina Alemaniak, Erresuma Batuak eta Frantziak, presio egin dute Santerren ordezkaria Berlingo goi-bileraren lehen egunetik aukeratua izan zedin. Ezen, iragan martxoaren 16an, bere komisario guztiekin dimititzean, Santerrek egoera kolokatsuan jarri zituen



HERIBERT PROEPPER / AP

Romano Prodi, Europako Batzordeko presidente berria, Frankfurtoko udaletxean, atzo.

EBko egiturak. Uneotan, izan ere, etorkizunerako aukera oso garrantzitsuak egin beharretan da EB, hala nola Agenda 2000 erreforma egitasmoarekin.

Berlinen hartuko dituzten erabakien gauzatzeko eta Europako Batzordearen ibileran aldaketak egiteko batzordeburu eragile bat behar zen izendatu eta Prodi antzekotzat emana da. Italiako gobernuburu izendatu zutelarik, inor gutxik sinesten zuen herri hau Euroaren esparruan sartzeko gauza izango zenik. Alabaina, Estatu italiarraren ibilera gastuak zorrozki murriztuta eta garraztasun politika bat bul-

tzatuta, Prodik eta bere Gobernuak lortu zuten ekonomiaz adituek ezinezkotzat ematen zuten apustua.

Batzorde berria jardunean ekainatik

Prodik ez du lan eskasik izango Santerrek zuzendutako batzordearen jarraipena bermatzeko. EB-ko estatu eta gobernuburuek erakunde honetan zein ere EB beraren ibileran egin beharreko aldaketek hitzegingo dute Prodirekin, apirilaren 12a baino lehen. Bilkura horren ostean, batzordeburu berriak Estraburgoko Parlamentuaren onespenean botoa jaso beharko

du. Hortarik landa, bere inguruan lan egingo duten komisarioak aukeratuko ditu EB-ko gobernuburuekin batera. Gobernuek proposatzen dioten komisario bat gustuko ez badu, atzera bota ahal izango du.

Amsterdamgo itunak zilegi egiten dion bezala, Ekaineko hauteskundearen ostetik osatuko den Europako Parlamentuak, berriz, Prodiren batzorde honi onespene eman beharko dio, Santerrenak bete behar zuen agintaldia bukatu arte, hots 1999ko abendua arte. Alabaina, bost urterako agintaldi bat onartuko diote 2000. urtarrilatik hasita.

soslaia

ROMANO PRODI • Europako Batzordeko lehendakaria

Ekonomialaria politikagintzan sartua



EUROPAKO BATZORDEKO presidente berriak, Romano Prodik, ez du erabat politikari profesional baten ibilbidea. Italiako gobernuburu aukeratu zutelarik, 1996ko maiatzean, oso eskarmentu politiko eskasa zuen, 1978 eta 1979. urtetan Industria ministro egona baitzen bakarrik Giulio Andreotti kristaudemokrataren Gobernuan.

Esperientzia labor honen ondorengoa, ekonomia jardueretara itzuli zen. Izan ere, ekonomia da 59 urteko gizon honen espezialitatea. Milanoko unibertsitate katolikoko eta London School of Economics eskola handiko diplomak jaso ondoren, Boloniako

unibertsitatean irakasle egon zen. IRI holding publikoko agintari egon zen bi aldiz eta egitura honek kontrolatzen zituen bankuen pribatisazioa burutu egin zuen.

Politika kontuetan, zentru-erkerrean sailkatu daiteke Emilia-Romania herrialdeko seme hau. Hortaz, ez da gehiegi harritzekoa italiar kristaudemokrasiak zart egin zuelarik, inguru honetako zenbait lagun eta ezkerreko jendeak elkartzea lortu bazuen Olibondoaren Aliantzaren. Batasun horrek Legebiltzarrerako hauteskundeak irabazi ostean, gobernuburu izendatu zuen Italiako Errepublikako presidentek,

1996ko maiatzean. Gastu publikoen murrizte zorrotza eta garraztasun politika bat bultzatu zituen Italia Euroaren esparruan sartzeko baldintza lortzearren. Lortu bai lortu zuen baina bere gobernu aliantzako ezkerrekoe-nak oldardu zitzaizkion eta bere agintearen aurkako zentsura mozioa boto bakar baten gehien-goaz onartua izan zen. Hargatik, 1996ko maiatzetik 1998ko azaroa arte agintean egonda, Romano Prodiren Gobernu Italiak azken 50 urtetan ezagututako egonkorrena izan zen.

Allande Sokarros

K O R S I K A

■ Bi jendarmeria tirokatu dituzte, baina ez dute biktimarik eragin

PENTA DI CASINCA eta Piedicorte do Gaggio herrietako jendarmeriak tirokatu zituzten asteazken goizaldean. Metraillardoz egindako tiroek ez zuten inor zauritu, nahiz eta batzuek militar baten etxebizitzan sartu ziren. Pentsatzekoa denez, ekin-tzak Korsikako Askapenerako Fronte Nazionalaren adar historikoak egin ditu (FLNC).

E R R U M A N I A

■ 400.000 sindikalista protestan

BUKAREST hiriburuan ehun mila lagun atera ziren atzo kalera sindikatuek deituta, bizi-mailaren jaitsiera kezkagarria salatzen. Beste berrogei hiritan ere manifestazioak izan ziren, eta orotara lauhun mila sindikalista elkartu ziren. Aldarrikapen nagusiak hauek dira: soldatak inflazioa adina igotzea, argindarraren, gasaren eta gasolioaren prezioa jaitea eta gizarte babesa handitzea.

K A T A L U N I A

■ Autogobernua nola handitu ikertuko duen batzordea sortu dute Legebiltzarrean

KATALUNIAKO Legebiltzarrak azterketa batzorde bat osatu zuen atzo herrialdearen autogobernua nola handi daitekeen aztertzeko. PPK ez beste alderdiek aldeko botoa eman zuten, baina batzordearen zeregin zehatzaren inguruan ez daude gutziz ados.

F R A N T Z I A

■ Mont-Blanceko tunelean izandako sutean suhiltzaile bat hil da

SUHILTZAILE bat hil zen eta bederatzi zauritu ziren atzo goizean Mont-Blanc mendiaren azpiko tunel barruan piztutako sutean, Savoiako Alpeetan. Antza denez, istripu batek eragin zuen sutea. 11,4 kilometroko tunel horren barruan atera eziniki geratu zirenak atera behar izan zituzten suhiltzaileek. Iluntzean, gutxienez sei langile zeuden atera ezinik, segurtasun eremuetan.